



Documentario

Mighty Lords, Kings and Queens

Creando concientizacion pa comunidad

DIABIERN atardi Ministerio di Cultura a sostene e presentacion oficial di e documentario 'Mighty Lords, Kings and Queens: Calypso and the politics of recognition' cu a tuma lugar na Cas di Cultura.

E documentario aki crea pa 2 hoben profesional, Shareli Emanuelson cu t'e cineasta di e proyecto y Gregory Richardson, kende t'e persona encarga pa documenta esaki y trece e documentario den un forma di buki, yama 'Calypso and Resistance in Aruba', a conta cu sosten grandi di Aruba.

Minister di Cultura, Otmar Oduber recientemente a ricibi e presentacion di e plannan di e hobennan profesional pa cu e documentario basa riba e herencia historico di Soca y Calypso cu sigur ta hunga un rol hopi importante den cultura di Aruba.

Manera e mandatario a indica na diferente ocasion, poco t'e historia di nos herencia cu

ta documenta y e presentacion aki ta duna indicacion cu ya e generacion nobo tin aliento pa sa mas y pa comparti esaki.

E presentacion aki a acentua elementonan importante di nos cultura den cuadro di e genero di Soca y Calypso, cu a duna inicio n'e formacion di nos herencia y a sigur pone hopi enfoke riba e importancia di educacion cu lo contribui na e preservacion di Aruba su cultura pa futuro generacionnan.

Minister Oduber ta hopi contento di mira con e generacion nobo ta tuma e iniciativa pa cuminsa cu algo cu tin hopi nesecidad na dje y ta haci un yamado na comunidad completo pa brinda sosten n'e proyecto aki.

Ministerio di Cultura ta felicita e duo creador cu a haci e documentario aki posibel tanto visual como den forma literario.